



PASTORS' TRAINING (Ni 10-11 July, 2025)



MISSIONARY ORIENTATION LEH SAWLDAW PROGRAMME

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



ESTD. MARCH 2008
AUGUST 2025

Hinna Vâk
Monthly Christian Magazine

AN ORGAN OF THE TANGPHAI PRESBYTERIAN CHURCH



GINGTUTE LEH GINUMNA

- Ginna Ah Chun La Um Nau Em?
- Khanglaite leh Nekhawlna
- Artificial Intelligence

EDITORIAL | SERMON | KOCHUAM HUANG | REPORTS | SÛNNA ETC.

Editor : Rev. Kamkhotinthang Neihsial,
Executive Secretary

Joint Editors : Rev. C. Lalremruata, Consultant
: Rev. Luttinlel
: Rev. Khaisonthang Vaiphei
: Upa Thualkholian
: Upa Nengsuanthang
: Pi Neikhovak, General Secretary, CKNP
: Tv. Lianmuanthang, General Secretary, CKKP

Business Manager : Tual Upa Langlalthamuan
TPC Office D. Phailian
P.O. Box 107 Churachandpur-795128
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man penuam leh a la thak nuamte'n Business Manager kiang ah hiatsak di.

A SUNG AH THU UMTE

1. Editorial	01
2. Kochuam Huang	04
3. Gingtute leh Ginumna	06
4. Ginna ah Chun la Um Nau Em?	10
5. Khanglaite leh Nekhawlna	13
6. Artificial Intelligence	18
7. Kochuam Hisel	28
8. KNP Huang	39

SYNOD PUIPATE

Moderator	:	Rev. Vanlalchhuanga
Secretaries	:	Rev. Andrew LR Khiangte (Sr.) Rev. Summinlian Vaiphei (Jr.)
Finance Officer	:	Upa Tinliankham
Statistician	:	Rev. Thianganlim Vaiphei
Executive Secretary	:	Rev. Kamkhotinthang Neihsial
Consultant	:	Rev. C. Lalremruata

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Khawtâng leh Sawlkar lam ah puitute'n Pathian dawigual vaihawmna a chiathâkpi theina ding un.
2. Kochuam Office ah semtute'n Pathian dawigual ah amau nâ chiat pha tak ah a sep theina ding un
3. Kochuam Vaihawmna chuam chuam - Bial, Presbytery, Synod te ah hotu leh Puitu te'n Pathian Thagau Thiangtho puina gual ah a mawpuakna chiat uh a sep pitin theina ding un.
4. I gam ua zillai chapangte, sepna hawl zing laite, Pathian thu (Bible) zillaite a ding in pauchap hitiu
5. Gamsung buaina ah panlatu pawl chuam chuam ah puitute â ding in pauchap hitiu.

MISSIONARY (2) I SAWL DAWK KIT THEI UI

Ni 16 December, 2001 ni ah Mizoram Synod ah lawplut i hi nung un Assam & Arunachal Mission Field, Chingmei Mission Field leh Myanmar Field-te ah Gamthim lam nasepna le Mizoram Synod etkawlna nuai in a um vek tai. Provisional Syond ah lânkai i hi nung un a masapen ding in missionary 2 i lakteu chu Jubilee Kochuam Biak In ah 27 July, 2025; 1:30 p.m. in **Sawldawna** hun mat a hi. Amau hin Karbi Anglong Mission Field huam sung ah Mizoram Synod Board etkawlna nuai ah sem inau. Synod Board mathilna Synod Kikhawmpi 2024 in a pawmpi dungzui in a chuam ah Mission Field neima chu ziagual hin chiapi zel di a hi. Kum 2025 ah kipat hin Gamthim nasepna (Mission) sukhathna ding in Account le a chuam ah hawn a hi tai. Tutu ahin Mission bîk a Sêmtu sêmlai- 13 (Pastor 3 leh a dang 10) i nei u'i. Zia chu a hi zia in Kochuamten Gamthim nasepna ah pan i lak zawk theina ding un Sêmtu chawpna (Missionary Chawpna) hi ngaikhawk zaw diak hitiu.

Sêmtu Chawpna ti hi Sawm ah Pakhat i piak nung ah pakua (9) i chante lak ah piak di a hi. Sawm ah Pakhat i piak lai ah, Gamthak ah i khen thak kha hilo a hi. I hiatthiam theina ding un Missionary nasepna ding ah panna tile hin bailam pen ina.

1970-80 tuam vel ah i gamsung ah gamthim nasepna lam ah halthakna a hung tun khan, kochuam sung ah thagau mangthaite lainatna a hung piang a, khangthak tamtak missionary ding in a la kuandawk u'i. A bullam ah i gen uh Field 3 te hung piandaw thei zia khale thagau mangthaite lainatna zia a la hi.

Zia hun lai ah chun, kalkhat sung ah hin Missionary kikhawp khatvei Biak In ah nei sek a hia, a nei dan dan uh- sum, huan thai

leh thingphel, etc te a chawikhawm sek u'i. Biak In compound sung ah gamthim nasepna ding ah Thing Bûk sâ leh Khawmual (Lo kuanté chawlmun) ah sâ le a um u'i. Hun hung chial zel in **'Jeremiah Prayer Team' (JPT) leh 'Gospel Edeavour Team' (GET)** le a hung piangdawh hi. Tichun, kochuam leh i gamsung chu gamthim lam ngaikhawkna in ei zel suak a hi. Kochuam khenkhat ah chun Missioanry Box a hun siam pan ua, kochuam bîk ah missionary chawm le a hung um thei ta a hi.

2001 ah Mizoram Synod ah i hung lut phat un, kivaipuak dan leh kochuam chiadan a hung kitheng ta. I Sawm ah Pakhat teu – Pathian Gam, Gamthak leh Tualsung ah khen a hi phat in mi khenkhatten Sawm ah Pakhat i piak zinglai in Gamthim nasepna/ Missionary nasepna ding ah kipia a hi tai ti hethiam lo pawl a um hi. Chun, Mission Field bawn kinei talo, Sêmtu Chawpna hi a ngai puai ti pawl le a la um kit hi. Presbyterian ah i lutnau hung sawt dungzui in Sêmtu Chawpna i hethiam deu deu tau a, kipak a um takzet hi. July tha ah Report dan in Sêmtu Chawpna ah sum hung lut zat ₹3,09,105/- a pha zo hi.

Zia chu a hi zinglai in malakna di tampi a um nalai hi. Kochuam khenkhat Sêmtu Chawpna chiapi thei nailo i um nalai ua, a Bial him him ah pe thei nailo le i um nalai u'i. Sêmtu chawpna kiti hi Missionary nasepna a hi ti kihil thak zel hitiu. Zia a nuai ahte hi Sêmtu Chawpna ah pan i lak theina ding un tepte leuhin:-

1. *Pakhat/ pani/ pathum pangkhawm ah Sêmtu chawp thei a hi.*
Cheng sang khat pe theite chu pakhat châwm ah pawm a hi. Mi pani in zanga gel a piak chun sang khat a hia, pakhat chawm a hi mai u'i. Ziagual ah pankhawm thei didan hi Kochuam Committee in ngaikhawk leuhin.
2. *Thagau mangthai lainatna a hi:* Kochuamte hin Sêmtu Chawp hi gamthim nasepna a hidan kihil nawn zel hitiu in, a tawm pen ah pakhat bek chawp thei didan lemguat hileh.

3. *Missionary nasep mi zosia hi makmaw a hi.* Missionary nasep hi mi zosia pan tei tei na di, sep makmaw a hi. Sêmtu Chawpna report thîlkhawm lai in member pakhat chun, “Bial khenkhat hi a nil tawp mai a, Sêmtute bék in chawmlo a hi diam uh maw” a hun tia. Ngaitua kham tak a hi. Pe tei tei ding ah kipawngbawl thei chu hikhel pua’na. Lal Jesu’n khawvel mun zosia ah Chanchinpha hil di ei ti zinglai ah, a sum ah pang nailo um khak thei a hi.
4. *Gamthim/Missionary Box/ Bawm:* Zia hin bailam tak ah gamthim nasepna pan theina di lampi a siam hi. In ah Box/ Bawm a kikawi nak chun a hawm in kawi khel pua’nau.
5. *Gamthak Committee:* Kochuam khenkhat â ding in Committee dindaw a haksat lai in, khenkhat chu a siam hak talua le um thei a hi. Gamthim lam ngaikhawkna ding ah panlak zelna ding in Committee din chiat gaw leuhin. Din a lemchang lo in le, Kochuam Committee in Gamthak nasepna enkai mai leh.
6. *Sêmtu Chawp be zêl a kûl hi:* I gen tak sau gual in Mission Account chuam nei ah Mission nasepna chiapi i hi tau ah. Mission nasepna lam hi nasa tak ah chiapi a, Mission Field hawn tup leh lunggul i hi zia un sum mamawna le hung pung deu deu di a hi. Tu ah i panlak danteu hi huntawklo di a hi. Zia chu a hi zia in, Missionary nasepna ah i thilpiak teu hi tusang ah i sukpun uh pawimaw ma di a hi ti hemillo in, Missionary nasepna leh thagau mangthai lainatna nasep hi kipadamlo in theitawp sua in thilpiak leh nasep in pan la zêl hitiu. Lalpa’n simtu zosiate gamthim lainatna lungthim in ei thuam chiat ta hen!



Kochuam Huang

Pastors' Training

Ni 10 - 11 July, 2025 sung in Tangphai Provisional Synod nuai ah Bial enkawl Pastor-te chun Thangkai-Lungpau Hall ah Training lawting tak a nei u'i.

Training hun ah Resource Person in Rev. C. Lalremruata, Consultant; Rev. Kamkhotinthang Neihzial, Executive Secretary; Rev. Vanlalchhuanga, Moderator leh Rev. Andrew LR Khiangte, Synod Secretary-te a pang ua, Training zaw Ni 11 July, 2025 zan in JP Leisure Turf, Bungmual in taksalam kipawllimna le a nei thei u'i.

Finance Campaign

Kum 2025 Finance Campaign kalsuanna ding ah Campaigner-te Orientation di Ni 29 July, 2025 leh Campaign di hun ah Ni 2-3 August, 2025 a lah kiti chu gawtui tam zia in kikawmtua theilona tamtak a hung um ta, zia zia chun, Officer's Meeting 49:5 chun gziagual hin guanggalna a siamthak hi.

- Orientation: Ni 29 August, 2025

- Campaign hun di: Ni 30 & 31 August, 2025
- Thembasuk Pastor Bial chu Vaiguan kisiam masa gual ah siam danglam a hi puai.

Missionary Orientation leh Sawldaw Programme

Synod Mission Board leh Synod Service Board malakna ah Mizoram Synod Mission Field i.e. Karbi Anglong Mission Field ah Contract Basis ah sem di Missionary pani (2) hawl na Synod Service Board in Ni 4 July, 2025 khan nei in, a nuai ah kitaklangte hi lâk a hui.

1. Pu Shyamlal Vaiphei s/o (L) Thonglam, Chawngkhawzo
2. Tv. Khamlallian s/o (L) Ch. Daipau, Hill-Town
(vide SSB 16:5 dt. 4.7.2025)

Lâk ah um Missionary-te chu Residential Orientation ni 17-18 July, 2025 sung in Tangphai Provisional Office ah neipi a hui a, Orientation Programme ah Resource Person in a nuai ahte hi a pang thei u'i.

1. Rev. C. Lalremruata, Consultant
2. Rev. Kamkhotinthang Neihzial, Executive Secretary
3. Rev. Vanlalchhuanga, Moderator

HINNA VÂK

4. Rev. Andrew LR Khiangte,
Synod Secretary
5. Rev. K. Jama Vaiphei
6. Rev. S. Khaikholam
7. Rev. Lalpiaklian
8. Rev. Siamlalron
9. Dr. Asem Vaiphei
(*vide OM 48:3 dt. 8.7.2025*)

Chuleh, Missionary Sawldaw Programme hi Ni 27 July 2025 (Pathianni) in Jubilee Kochuam Biak In ah nei a hi. Programme ah hin Missionary-te chanchin genna leh hetsakna Rev Andrew LR Khiangte, Synod Secretary in a nei ah, Sawldawna thucha Moderator Rev. Vanlalchhuanga in gen in, Pauchap piakna Rev. C. Lalremruata, Consultant in a nei hi. Synod Choir, D. Phailian Pastor Bial Lapawl leh Lamka Pastor Bial Lapawlte apat in ngaithak a hi.

Gari thak

Ni 29 July 2025; 10:00 a.m. in Tangphai Provisional Synod Office ah Consultant mat di Gari (Bolero B6) Mizoram Synod in a hung ngaitua piak chu Rev. Vanlalchhuanga, Moderator in Pathian kiang ah latna a nei thi hi.

Writers' Workshop nei di thu

Synod Literature & Publication Board malakna in Ni 21 August 2025 hileh Thangkai-Lungpau Hall ah Writers' Workshop um di a hi. Zia hun ah Resource Person ding in Rev. Kamkhotinthang Neihsial, Executive Secretary leh Upa Dr. Soilalsiam guat a hiu.

Workshop ah hin Pastor, Pro. Pastor, Minister, CKNP – 2, CKKP- 2, SL&PB Member-te leh Bial tin ah kipat mi pathum sang ah tam zawlo guatte pang di a hiu.

“Haksatna thiguapi hi hinkhua susia leh lungkhamna tuntu ding bep ah tuak i hipua, a khen chu i lampi mutthial ding ah Lalpa’n a hun sawl a hi zaw sek hi.

~Anonymous

GINGTUTE LEH GINUMNA

~ Rev. Luttinlel
T. Haimual

Ginna ah chun la umnau em ti nangmau ngei kipatep sek unla, ki-enchian un. Ahiloleh, nangmau ah chun Khrista a um hi ti la kihechian puau ah a hem? Dawilo la hilo ngal uh chun! (1 Korinth 13:5)

Gingtute i ginumna diu khenkhat a nuai ahte ah kipat hin vak sui hitiu.

1. Nasepna ah Ginum: Nâ ah ginum le a ti thei hi. Mi pangâite chun i theina dungzui in nasep i nei chiat uh a hi. Pathian ei tiampiak gual in khawsa-ul pawt ah gimtak ah nasem ding ah piang i hui. Zia i nâ chiat ua ginum ding ah Pathian leh miten ei kineppite i hi chiat u'i. Nitin in nasep theina di hun leh phât kibang i nei chiat ua, zia i nasepna chiat ua chun ginum tak in i sem uh em ti chu i ki-etchian ding uh a pawimaw hi. Thu kigensawn khat chun, Nasepna ding khat ah a latu ding chun, "tu chung nâ lakna ding ah

hin, Kochuam ah kimang Khanglaite laklo ding a hi" ti in a gen hi ti ahia, ei uh gingtute â ding ah chun zachat umtak a hi.

Sawlkâr nâ hi henla, Kochuam ah i nasepna ah i nisin nasep, Office ah semte, kilawfate, sumkawivei leh a dang dangte, i nasepna chiat ua hin ginum tak in i sem nau em? ti kivel chian chiat hitiu. Nasepna ah mi ginumte chu Kochuam in a mamaw ma ma a hi.

2. Sum leh Pai ah ginum: Khawvel i khawsak sung ua hin i matchak ding ua

HINNA VÂK

Sawlkar in a siam chu sum/
paisa hih a hi. Mi zosian
zia paisa chu mang in i
khawsau a hi. Gingtute
hi sum leh pai ah ginum
ding ah kineppite i hi
kit u'i. Ginumna ding ah
pawimawte lak ah hetmil
theilo chu sum mu leh
mat thu ah ginum ding hih
hi ngei ina. Thildang ah
ettawn tâk leh fel ma ma
hi ngal sum leh pâi ah mi a
ginumlo ua leh mi ginmaw
kâi leh taksan umlo a suak
sek uh a hi. Pawlpi tamtak
kituaklona/ kikhenna leh
buaina tamtak hih sum
leh pai ah ginumlona leh
lepguknate zia hih a hi
nuam ma ma sek hi.

Sawlkar ah thubuai
(case) tamtak haw hi
nekguk, châkgukna thu
a tam ma ma hi. Gam
vaihawmtute tamtak hi
amau â ding ah Sawlkar
sum a huailut zia ua
hausa tamtak a um uh a hi.
Tu tuam ah hin Kochuam
sung ah sum leh pâi thu ah
buaina a um pua, thil kipak
um tak khat a hi.

I Synod hin sum leh
pai etkaw! didan, DAN
kitup tak i nei nung ua hin,
sum mu leh mat thu ah hin
kituplona het ding a um
pua, tu gual ah i chiato zel
thei ua chun sum leh pai
ah masawn kinep a um hi.

Pathian chanvo, sawm
ah pakhat piak thu ah hin,
i ginumnau em? Eima
chanvo sawm ah pakua lak
ah pat in Lalgam nasepna
ding ah hin i pesek nau em?
Sawm ah pakhat bep pia/
lândawk sek gingtu i hui
chun, thilpiak ah nasepna
ah pang nailo tina a hi.

Sum leh pai ah ginum
tak ah Lalgam nasep i
nawp a hi chun, Kochuam
sum etkaw!na hileh, eima
mimal sum muna leh
matna ah hinle inkuante'n
i sum matna ei hetpilo
uh umlo a, kichiansuak
(transparent) a hi ding a
hi. Pawlpi Kochuam â leh
Insung ah i sum mu leh
matnate hih Audit bawl ah
Muna, Matna leh khut ah
umzat a dik di a hi.

Ziagual chun Gingtute hi i ginum chiat ua a hi chun Kochuam chu Pathian in ei malzawl ngei ina. Sum leh pai ah ginum mi Khawvel inle a mamaw ma ma khat a hi.

3. Hun mat ah ginum:

Tumalam ah khan “Hun hih sum a hi” (Time is Money) ti thumal hi a kigen sek a, tulai ah hin “Sum sang in hun hi a manpha zawi” (Time is more valuable than money) ti a hi zaw tai. Zia umzia chu sum nei di leh khawsak theina ding ah chun hun hi matdik a pawimaw dan genna le a hi. Hun mat i thiamlo zia un i phâkna di chan phazolo tamtak i um uh a hi.

Mi zosian kibang tak ah nasepna di hun Pathian in ei pia, i matdan ah hin kilunggel thak a pawimaw ma ma hi. Hun mangthiamte chun a hun neiteu phachuam tak in a mang sek uh a hi. Upate thuching khat in “Mi thada chun kaw! ah vannim a

ngak hi” a tiu a hi. “Danleh ti in hun tam a liam mangzotai” ti La le i sa sek uh a hi.

Nasepna di hun kipia sungah nasepdingah umte ginumtak in i sem nau em? Hun mat ah ginumna di khat chu, hun chawmcha mangdingah gen ngal a, a ngâithate chimchak di hial ah hun mangte chu hun mat ah ginumlo, i thugen ah i ginumlona a hi sek hi. Tu mâ sâng in hun hile chawm deu deu a bang ziang tai, nasem tam utte â ding in.

4. Thutiam ah ginum:

Gingtute hin Pathian leh mite mâ ah kitepna i nei sek ua, Pastor namdet hun ah te, Nupan kikhutsui hun ah, Kochuam Upa namdet hun ah leh a dang dang ah. Sawlkar inle nasem ding a lâk phatleh kitepna/thutiam a nei sak sek uh a hi. Thutiam ah dettak ah um ding in kitepna nei a hi sek hi. Ahinla, mi khenkhat a kitepna ah ginumlo a um sek zia in Gingtute â ding ah chun mualpho um

HINNA VÂK

tak a hi sek hi. Tu malam ah khan i Kochuan hinle, Ginna thutiam i lah ha bawl sek uh a hi. Ahinla, tuhun ah hin Kochuam hin lem a kisapua, a lah bawl talo a hi (Mun khenkhat ah chun um maithei). Thutiam gual ah sukpitinlona a um phatleh gingtu hinkhua sunuamlo leh kiphatlamna ah dimna a um sek hi. Kitepna i neiteu kumkhat â di a h'em, damsung â di a h'em ah kitiamte chun ginumtak leh Pathian muang ah sukpitin chu Gingtu bawl di him a hi. Thuthiam ah ginum gingtu chun Lalgam a keklian sek a, Kochuam leh khawtang a himasawn sek uh a hi.

I Bible inle kihâksial a h'em, kitepna lam him him hih a kipakpi puai ti hi

hetthei in a um hi (Tpl 5:5). Thutiam ah, sukpitinlo sang ah chun tiamlo law law a hawi zawkdan a gen hi. Gingtute hi ginum ding ah kineppite i hui a, i ginumlo khak a hi chun Insung leh Kochuam in a thuak sek hi. Khawvel leh Kochuam hin a mamaw ma ma chu mi ginumte a hi.

Thukhakna: Ginna ah chun i umnau emle? Eimau chiat kipatep sek hitiu in, eimau ah Khrista a um hi ti kihechiente i hui a, Khrista'n ei dawî ah ginum ding ah tatdawte i hi ngal ua. I nasepnau, i sum leh pai muna leh matnau, i hun matdan ua leh Pathian leh mite ma ang ah i kitep gual ua supiting chiat ding ah kilân a sempiting chiat thei ding in Lalpa'n ei panpi chiat ta hen!

➤ *Khawvel tawh i kibang taluau ah khawvel in ei hua theilo a hi.*

➤ *Kraws kiput ah Jesu nung zui hi talo in, Kraws lim awk in mipi i zui zaw tau a hi.*

~ *Anonymous*

GINNA AH CHUN LA UM NAU EM

~ Upa Thualkhawlian
Hill-Town

***Ginna ah chun la um nau em ti nangmau ngei kipatep sek
unla ki-enchian un (2 Ko 13:5)***

Ginna lo in Pathian chu sukkipak thei ei puai (Heb. 11:6)

***Bangkim Ginna lo ah thil kibawl taphawt chu gitlona a hi
(Rom 14:23b)***

Ginna thu ah hin ginglote'n Pathian thu a pawm masang un gingu ka hi kiti leu kipawm theilo ding a hi ti chu a dik ah ngai hi di a hi. Himaleh a dawnhuna zawk chu "thei e" ti hi a hi. A ziak chu Setan inle Khrista chu Pathian chapa a hi ti a pawm a, a ging a, maleh a dodaltu'n a pang a, a langpan hi.

I Bible in ei kawkmua tuppen chu ama ah kingak ngam Ginna hih a hi. I Bible hin "Nasa tak in ging un" le a ti puai. Ginna ah chun la um nau em ki-enchian zel sek un a ti a hi. Ginna ah um leh umlo bangti ki-etchian ding a diam le?

Mosi chanchin ah kipat in vak en hitiu: "Ginna ah Mosi chu a hung pitin phat in, Pharaoh chanu chapa hi ding a nuam tapua, Pathian mite tawh sukgenthei a têt zaw tai" ti i mu'u a hi (Heb 11:24). Mosi chanchin a hun genzawm a, "Mutheilo Pathian chu a mu ziak in a thuak ham ham hi" (Heb 11:27)

Bible pawlam vak gen hitiu: Mosi chanchin i hiatsau ahia, Bible pawlam a chawmlam in vak gen hitiu. Aigupta lengpa chanu melhawi leh duangting tak Mosi lungsiattu khan Mosi'n leng Insung a thangai zo tak tak tapuai ti a hiat phat in, hiti hin a gen hi: "Bang ziak ah lungkham la hem? La

HINNA VÂK

mi Israelte a gentheinaw ah
kipat a suachat theina ding
uh lampi umsun chu, zia leng
Insung ah thuneipen hina
mang ah bulpat di hizawlo a
hem? Ngaitua chian in”

Khawvel ngaidan in chu
a dik le a hi maithei. I tulai
Politics tawh le mekmat thei
tiang um tham ina. Himaleh
Pathian thu lam ah chun,
Mosi’n mu theilo Pathian chu
Ginna in a mu (a) Pharaoh
chanu chapa hi a nuam zo
pua (b) Pharaoh makpa hi le
a nuam diak pua (c) Aigupta
leng/ Siamang ah pan ah
a mite sukgentheina kipat
suachatna di lampi hawl le a
nuam diak ta puai. Khawvel
Dan zui ah bulpat a nuam pua
(d) a Pathian a ginna formula
tawh a kituak thei puai.
“Mutheilo Pathian chu Ginna’
a muziak in a thuak ham ham
hi” ti a hi kha. Ginna zia ah
a thawk ham hamna zia in
Lalpa Pathian a lungkim a, a
mi Israelte chu Pharaoh sal
ah kipat in a hukdawk thei ta
a hi.

**Bible pawlam ah kipat
ngaidan:** Bible thiamte leh
khanglui history suite gendan
ah chun, leng Pharaoh in ama

thasang ding ah a la hual gûk
(khânguk) chu Mosi a hi.
Himaleh, Mosi in leng dinmun
chu tu ta bangleh leng chapa
Ramesis in lalchutpha chan
tei hun gaw ding ahia, Leng
Insung ah chun pawl/ party
2 hung um intin uh, Mosi
dinmun a nêl a ham in hun
suichian di a hui. Ziatak chuleh
Pathian thiltup Kanaan Gam
ah a mi Israelte puiluttu ding
ah Pathian Thuthung Mosi
chung ah kinga chu hung
lawsam (fail) di a hi.

Ziagual siatna pumpel
theina thuguk chu i Bible in
“Ginna ah Mosi chu a hung
pitin phat in, Pharaoh chanu
chapa, hi di a nuam ta pua,
Pathian mite tawh sukgenthei
a têt zaw tai” ti’n a gen hi.
Zia Bible chang ah hin Piting
ti thumal hin a huntawk pua
Ginna ah a hung Pitin phat in
a ti se se hi.

Bang in ei lua dim sek em:
Gingtute hi bang in ei lua dim
sek em le:

- 1) Mit ah muthei lei lam
kinepna zawk in maw?
- 2) Mit ah mu theilo chunglam
kinepna zawk in?

Mit ah muthei lawtin hun leh nei hun bep ah kipak leh lim gua i hi chun, neilo dinmun ah ding ah i kihiat phatleh i limna leh kipakna chu suksiat ah um intin, Ginna lamkai ah têt in a huitung zolo hi di i hi.

Ki-enchian zel ding in ei tîlkho: La hinkhua hi (a) Bang in a hem hilim sek? (b) Bang in a hem hun thamuan sek? (c) Bang in ahem hun kalsuan sak sek? I Bible in Ginna ah chun la um zing nau em, nangmau leh nangmau ki-enchian sek un ei ti a hi.

Ginna ah umte chun Mutheilo lam zawk a têt ua, khawvel lopina leh mawinate chu chang thei, nei thei dinmun ah a dinlai unle ginna ziak in Aigupta go thilte sang in Khrista hepina chu lopi zaw ah guat in, Ginna ziak in khawvel ngai ah (a) Mawl law khawlaw zawknate (b) Guallel zaw ah pan ngam zawknate a chang ngam sek uh a hi.

Muthei ah chialo in: Paul chun, Ginna ah umte chu “Muthei ah chialo in Ginna in i chia zaw sek u’i” ei ti a hi. Himaleh gingu kiti tamtak hi chu (a) Mu neilo mu kiti ngal

(b) Mu thei ah kingai kitam kha sek ding in ginchak a um. Ginna ah umte chu (i) Mihing mitmei hi zawlo in (ii) Lalpa mitmei a thîl thiam zaw sek ua (iii) Ama’n Lalpa a hiat sang in, Lalpa mi hiat a kûl zawi. Ginna ah um ziak ah In leh Lo, nei leh lam ngainêp ah, dawtlo dâilo ah kawî di tina lam ei puai. ‘A gam leh a diktatna chu hawl masa un, tichun zia thil zosia chule piak belap in um inlau’ (Mat 6:33) ti ei tiam hi. A vûm a vâl in a ti pua, piak belap di ei ti a hi. (*a bonus piak ei tiam hi*)

Jesu’n Pa kiang ah a pauchap ah khan hiti hin a gen hi “Ka Pa thiangtho khawvel ah kipat amau hi ladawk ding in ka dawn puai, amau haw thu gen ah kipat kei ei hun ging di te tiang in ka pauchap hi” (Joh 17:15). Baptistu Johan in hiti hin a gen hi “Kei hin tui in ka Baptis sek hi, keima sang ah lopi zaw hung ding a hi. Ama chun, Thagau Thiangtho leh Mei in hun Baptis ding a hi” Luk & Mat 3:16:11. Mei ti thu hi i Bible ei chiapi dan ah chun Thilhitheina etsakna a hi.

KHANGLAITE LEH NEKHAWLNA

~ Tv. Lianmuanthang Vaiphei
General Secretary, CKKP

Khanglaite i ti chun tuchung hi a kum lam gen sâng in kuate hi khanglaite tithei ahi'u em hiatchian zawk a pawimaw'i. KKP Dân Bu in KKP pang ding kum bithiak a nei ah, maleh zia kum lak in a huamte bep gen ding i hipua'u. Bible in ei gendan chun Khanglaite chu lungthim thiangtho, tha hât, fel, taima, kichamna siamtu leh gingtute ettawn ding ah hinkhua mang ding in nasatak in eila ti'i. Kochuam leh insung ah khanglaite hi kingakna tâk hithei ding in panlak chiat a ngai hi. Khanglaite hi'n mawpuakna liantak nei ihi'u.

"Nekhawlna" i ti kit chun taksa khawsakna ding ah pawimaw ma mate- nêk leh châk, sil leh chên, mani pawimawte, chenna In-te neitheina ding ah sum lawdaw leh muna hi a hi. Sepna nei, sum kawlvei, mani kitodelte hi sum lawdaw theinate chu a hi. Career Guidance gual in ziagual sepna, zia tigual bawl ah, nekhawlna lampi a hi ti in kichiantak in vang genlo ding ihi'u.

Khawvel ah i umsung u'a hin sep leh bawl ding tamtak i nei

ah, Pathian nasepna lunglut leh hawitak ah septheina ding leh insung khawsak buailo nading in nekhawlna kitûp leh diktak nei a ngai mama hi. Diktatna tawh nekhawlna hi chiapi a hilo chun Pathian Lalgam nasepna hin lawting thei diaklo ding ihi'u. Nekhawlna hi kum upalam a he'm, zi/pawsal nei ah cha leh nau neite bep â ding in kawi a la hisek ah, zia hi thil diklo a hi. Khanglai hunlai apat in nekhawlna lunggel, insung khawsak na ding ngaituana nei

a kûl takzet ta'i. Zia zia chun, Khanglaite hin lunggel thak ah, tunung ah Kochuam leh i insung a masawn zel theina ding ngaitua in lunggel thak ding in i kichial a hi.

Nekhawlna hi i hatlai hun sung ah bawl a pawimaw ah, I Timothy 6:10 in, *"Dangka sum ngainat hi gitlona chitin bul ahi ngal a; khenkhat in hausak nopna ziakin ginna chu jamsan in, amau leh amau lungngaina tam tak a kisunkhum sek uh ahi."* ti'n ei gen hi. Nekhawlna buaipina lam ah mangthai thei a hi ti kihia zing ah, Pathian thu kibulphu zing a ngai hi.

Khanglaite'n nekhawlna ah banggual lungtup i nei ding uh a h'em tâklang le'u hin-

1. Bang hem a pawimaw masapen?

Sappau in "Basic Needs" a kiti, nisin mamaw pawimawlo kuama a kiumpua'i. Nisin mamaw haw khanglaite'n mani â ding i neithei guat a ngai ah, insung mite chung ah kingak zianglo ding a hi. Bang hem ka bawl thei? Bang hi sem leng insung

â ding in nekhawlna'n ka pangthei em? ti lunggel nei a, sepda neilo ding a hi. A tîl in bangma a bailam ngeipua, a bul pan phawt hitin, maban a hawizaw leh sangzaw neithei dan lampi um intin, lunggel thiam ah i dinmun apat masawn zawk didan le gel zing ding a hi. Danglamlo Khanglai i hi le vâng nekhawlna kawng inle bangma chan tung zolo ding ihi'u. Lekha sim ah sepna hawl i hi inle gunchu tak in pang hitin, hun khendan thiam hitin, kochuam ngaisaklo khanglai lekha sim vang higuat da hiti'u.

Nekhawlna a hin hun matthiam leh lunggel (planning) i nei seklo ziaak in nisin mamaw natiang nei theilo in a ki-um hi. Bangma chan i tungzo pua, mawk buai in a kibuai zaw sek ah, gingtute ettawn ding khanglai ki hizo seklo a hi. I dawite khêl in i mamaw zawk ngaitua masa hitin, i malam ah hung phachuam ding thilte zawk nei masa in; chuti leh nekhawlna hawizaw i neithei hun inle

HINNA VÂK

lamzang tak ah chia thei hitin, dawi nei theina lampi hung nei ding ihi'u.

2. Bang hem i thiam zawng?

Pathian in mihingte hi thiamna zat chuam chuam nei in ei siam ah, ka thiamna lam hi bang a he'm? ti dawtna hi siam in, hiatdaw ding a hi. I thiam zawng i bawl in lunglutna ei piak khêl ah taksa tiang le gim leh chawl lam hephalo in umthei a hi. Lekha sim hitaleh thildang inle i thiamzawng te hi nekhawlna'n a matthei em? Thil i la bawl khakte apat in bang hem i sep hawi thei diak? tite hi ngaitua in; a pawimaw chun insung mite, lawi leh pai te kiang ah i thil bawlte hi nekhawlna eipe thei diam ti kidawt zachâtlo ding a hi.

Chun, kizil pei ah, ginum tak ah i sepna mazawn chiat kha sep zing ah, thada kawm a sêm hem, minphatna ding leh milak ah mittêt chungnung zawkna ding ah bawl hikhâk di kivêng

hiti'u. Thiamzawng bawl hin midangte bangmalo ah kawi ziang a bailam ah, nekhawlna khanglaite um didan a hi him him pua'i. Lunglutna leh bawl theina lam a kibang pua, maleh, nekhawlna ngaitualo theilo i hi ziakun pilvang tak in Pathian dawng zing ah sem hitin, mite'n ei hiatding ua tigual ah khanglai hilai ah sem ka hi ti kitaklat sese a kûl puai. Pathian dawigual nekhawlna nei in, titakna leh ginum in sem le hin Pathian in nikhat ni leh ei kitaklanglo le hinle mite hiat kihi thei ding a hi.

Pathian apat thilthawnpiak i talent-te mangthiam in; lekha sim te'nle i lunglutna lam khan, insung i hung khawsakna ding leh nekhawlna kitûp i hung nei theina ding in kukal chiat hiti'u.

3. Nekhawlna dik

Nekhawlna lampi tamtak a um ah, zia lak a chun khanglaite hin lampi têt thiam in pilvân a ngai mama mai hi. Bible ah i

mu gual in Pathian in a
siam mihingte hi nasem
ah nêkmu ding in kawi a
hi. Pathian in nekhawl thei
ding in thahatna eipia; pilna
ei piak, lunggel theina i nei
haw hi nekhawlna mang in,
Pathian hetmilna manglo
ding in Bible in ei kawkm
hi.

Insung khawsakna
ding leh Pathian Lalgam
na i septheina ding
in nekhawlna kitûp a
kipawimaw ah, dikna lampi
zui thei ding in ginum hitin,
bailam tak ah sum mu
hem; taksa gimna leh tha
chawl na panglo nekhawl na
vâng etla da hiti' u. Haksatak
ah mute hin kipakna ei pia,
matdan lam inle a kithiam
ah, Pathian in lopina a
chang zaw sek hi. Bailam
tak leh diklo tak ah muna
hin kipakna bukim eipe pua,
kineplo nalam ah matna
ding a tam sek mama' i.

Pathian in damna
ei pia, tigual thuphate
hethei ding ah i umthei
hi, a dawigual nekhawl na
nei theina ding zawk ah

mang in, malsawmna le
dawng ding ihi' u. Sum leh
pai i lawdawna hin Pathian
chawihawi zawi tin, ei
malsawmtu gelphalo ah
umkhâk thei ahia, kiveng
hitu. Diktakna lampi zuite
chu Pathian in a hemil ngai
puai.

4. Mu tamna di' n piakdaw a ngai hi

Nekhawl na hawi i dawi
chun huangphal a ngai hi.
Mi tamtak te hi sum leh pai
i hung neitak leh, a neilo ah
umdan a kithiam deu deu
ah, zuau gen khawksa talo
in, Pathian thu' n eila gente
hemil ah umziang a bailam
ta, mi tamtak i chiakhial
na' u le a hi. Nekhawl na ti
hin sum muna a hiziak in;
dangka ngainatna sual ah
puk ziang thei a hitai. Zia
gual hun i tuaklona ding in
Pathian in ei malsawmnate
neu in lian leh geldawk
thak zing hitin, i theina um
chun panpi ngaite panpi in,
sawmdawl ngaite kaitua in,
i nekhawl na in lawtingna ei
piakbe ding a hi. Huangphal
ti hin a vâl ah nei zia ah
kiphal a hiziang pua, Pathian

HINNA VÂK

apat malsawmna i dawngte geldaw ziak ah ei petu piakthuk kit utna lungthim nei hi a hi. Sawm ah pakhat bep hi a huntawk a hipua, huangphallo chun Pathian in Ama kiang ah piakthuk kit ding ah ei ti – Sawm ah pakhat le piak haksa kisa ding a hi. Nekhawlna i mudaw a tawm maithei ah, tawm in tam leh Pathian chawihawina mang in, banggual mule hinle i sang ah neilo um ahiu ah, panpi zawk ngai um a hi ti lungthim nei le hin i vangphatdan geldaw diak hitin, mite panpi thei ding ihi'u.

5. Malam sautak ngaitua ding a hi

Nekhawlna i ti tak leh i (khanglaite) lungthim un ngaikhawkna hi a um zo tak tak nai pua, lunggel kisiam vaigei sek a hi. Khanglai hun hi kipat huntak ahi'a, tunung ah insung hung enkawl ding leh Kochuam, khawtâng hung

enkawltu hithei vek i hiu ah, kipan hitiu. Kochuam ah i kimatnateu hi mang phachuam in, kiziltîlna, kikaihuainate, sum etkawl dân leh Kochuam masawn zelna ding ah i zilte'u haw hi Khanglaite'n Nekhawlna kalbi pawimaw tak ah neithei i hiu. I hun matdan uh hi nekhawlna lampi kiziltîlna vek a hi.

Bang gual nekhawlna hawi nei in, lekha sim in lawting le hinle mani kipakna leh lungawina neithei ah, Pathian kiang ah kipakthu gen zing thei a ngai zaw'i. Tunung leh Nekhawlna lawting ka neitak leh Kochuam ngaikhawk katin, ka theitawp in pang ingka ti hi a vaigei thei hi. Mite'n ei entawn ahi'u ti hezing in, i kam ah i gen dawte gual ah umthei ding in panlâk ah, i damlai hunsung chawmcha hi khêkchâk neilo in, Pathian na sep zing, diktak ah nekhawlna'n hun mang le hin, i kinepkhêl malsawmna kidawng ding a hi. Khanglai leh gingtu diktak thada a um ngai puai.

ARTIFICIAL INTELLIGENCE

~ Tv. ThangMohan Vaiphei
Assistant Secretary, CKKP

Tuni ah AI chungchang ka zik hi, a dikpen leh a bukimpen a hi ti lunggel nei ah zik a hi puai tihi amasapen in ka hung taklang hi. Lekha chuam chuam leh hiatna khenkhat thuakhawm ah zik a hi. Chuleh AI chungchang ah hin tulai khang â ding ah masawnto jel ding a hina in, tuni ah kizik pen hi hun hung chia jel â ding ah outdated hung hi thei a hi zia in, simtute zosia'n lunggel ah i masang diu ngaituana nei kawm ah sim zaw ding in ka hung chial hi.

Elon Musk, Jeff Bezos, Mark Zuckerberg leh a dang dangte hi Forbes Magazine ah 2024 kum sung zosia'n Khawvel ah mi hausa pen pen hi ah sukrat a lah hui. Khangthakte'n chu zia mite hi kua a hui ti genchian ngailo in, a minthan dan chuam chuam ua kipat in a hiatsa vek uh a hi. Tulai Technology khawvel thunun zotute a hui ah, khawvel hi kisang danglam phut jiang thil a hung umlo nakleh chu, a minthannau leh a hausatnau hi pung deu deu ding in a kilang u'i.

A chung ah min i taklatteu hin, thil kibanglo tak tak ngen a buaipui ah, a thiamnau leh a ngaisak lam uh le kibanglo tak tak hi ngei ina. Kawng bangkim ah danglamna um maleh, kibatna pakhat a nei

uh a hileh thil thak, bawldan thak, thiamna chiat pawdawk theitu hina hi a hi. Thilthak, bawldan thak (Sap pau ah chun Innovation) hi khawvel ah danglamna tunsaktu a hi. Khawvel chiadan theng danglam theitu, mi lopi leh hausa pen pente hi bawldan thak mang ah sumhawlna lampi bawldawktu a hi sek u'i. Technology khawvel ah um i hi tak zia in, Thilthak/bawl dawktu thak (*Innovation*) lam ah masawn leh pan nasatak ah la masate gam chu changkang leh khawvel economy dinmun ah mapuitu hung hijel ding ah iu ti lehin gen khiallo di i hui.

Khawvel changkang hi tawh i hinkhua hi chiakhawm sak theidan tamtak le a um kit hi. Zia mangthiamte chu,

HINNA VÂK

gam hausa, gam zosia ah vaihawmtu ahilo leh thuneitu a hi pen kit u'i.

1. Artificial Intelligence (AI)

AI hi a hinatak suidaw di hitaleh, sau tak sui ngai intin, chuleh hilchianna le sau deu ah suklat ngai ding in a um hi. Ahinla, zia lam sang ah chun, pawimaw di dawl neucha cha in suklat theidan dan in hung gen di ka hi.

AI hi 1956 kum ah Dartmouth Conference mun ah puakdaw in a lah um ta, zia chu scientist pawl neucha in a lah puakdaw uh a hi. Amau cheng chu *The Founding Father Of AI* a lah kiti a hi.

AI hilchian ding in thuk tak hilchian di a pawimaw khawp mai hi. Ahinlah, Computer kiti i hiat uh kipat khan, i lah gen sek uh chu "Khawl thuak nei" tia i lah gen uh AI hilchianna hawitak himai ina. Computer pangai, tu i mat sekteu hichu, ama ma-ang ah chut ah sep sak di leh bawl sak di dawl bawl sak kha a hia, a mangtute thu thu ah bawl sak thei a hi. Ahinla, AI in chu ahileh Pilna leh hiatna hichu banghem tiang chu a hung nei ziang tai.

AI Hilchianna tangpi ah gen didan ah chun "Mihing pilna gual hi khawl sung ah kawi

lut" hi AI um didan ah gen a lah hi a hi. Tu laitak ah AI kimat dan tangpi a hi leh, thil umsa (*Database*) apat in, na a sep hi a hi. Banghem tiang chan in a hung dawnhu thei ah, milim leh gihawi siam thei, chuleh zia AI thilsiamte ah kipat hin mihing in le zil theina tiang nei in, zia bep chu hilo in, thil dang dang le tamtak a um hi.

Bawl didawl, thil neucha cha hilo in, mihingte pilna gual ah, a hun dungzui jel ah banghem tiang ah mat thei di ti'n, Artificial General Intelligence (AGI) hi mithiamte'n a buai pi laitak uh a hikit hi. Zia sang ah chungnung jaw kit khat chu, Mihing pilna sang ah sangzaw, Super AI (SuperIntelligence) te hile siamdaw kit ding in a um pan tai.

AI hin awl awl cha'n banggual in ma a sawn em ti hiatthei tiang chu

- * 1956 - AI kiphu kum, 1966- ELIZA chatbot, Chatbot (mihingte tawh kiholim thei)
- * 1980 Rise of Expert Systems, 1997 - Deep Blue Kasporev, 2012 - Image Net
- * 2016- AlphaGo, 2016- Google Assistant, 2020- GPT-3 released
- * 2023- GPT-4 leh Multi-

Modal models.

- * 2024- Rise of Generative AI Tools (Text, Image, Video leh Code) te hi i hiatlo kâl ua i lah mat to jelteu chu a hi.

2. Artificial Intelligence leh Zilna

Thilthak puakdaw lam ah khawvel gam chuam chuamte kinialna, Global Innovation Index (GII) ti chu World Intellectual Property Organisation (WIPO) in a piandaw sak sek hi. 2024 kum ah khan khawvel ah gam 133 lak in India hi 40 na a pang pha a hi. I gam sung ah khangthakte â ding in zil di, hiat di tamtak umna khawvel a hi tai. Thil khat bep ah lunglutna chiapi thei a hi tapua, nasatak ah khawvel thil hile hiat leh zil pawimaw in a kilang ta a hi.

AI chun i hiatlo kâl un, i gam uh hi awl awl in a hung lua pan chu a hi. AI masawanna'n a huap khawmte lak ah kilang diak pakhat chu, thil umsa ging/ngansia ah, bailam tak ah bawlung zung zung nawpna hi a hipen hi. Haksatna leh pawimawna ah hin, ngaituana seng ding in ei dawi ah, zia chu khawvel ah innovation lopi tak tak hung piandaw dan bul a hisek hi. AI thiamna hin zilna lam ah, bailamna tamtak a tut ah,

zillaita â ding in phatchuamna tamtak a tut hi. Ziagual ma chun, a phatlo dan leh phatna i hiatdaw uh a pawimaw hi. Bailamna hin mi a suthada thei ah, hawitak leh thûk tak ah thil ngaituana pelo in, lungthim thiamtheina (*creativity*), lungthim seng ah bawldaw lam sang in, taimatlona uang deu deu hi in a kilang tai. A umsa kinga/ngansia di a tam tâk zia in, AI apat bailamna hin khanglaite tuitum khak di a lau um khawp mai hi.

Simlaite bep hila in, zilsaktute le a hitho kit u'i. Note/ study materials siamna, ngaidan lak khawmna AI (Chatbot/chatGPT) i mang nasa khawp mai ui ti a kilang hi. AI hin Thu leh Lâ hawitak takte, essay hawitak takte, thil him him dawnhuna hawitak takte le ei ziksak thei a hi. Himaleh eima kihawldaw, zildaw lam leh hiatbena lam sang in, eima leh eima kiginchatlona hung lian in tin, a tawp leh zui tâklo hi kha hitiu. I zilna teu hi, a tak ah, eima hiatna ngei mang phachuam thei ding in kisingsak hi a pawimaw ah, zia chun khawl hitheina kinga jiang hilo in, a tak tak ah sepdaw a ngai hi.

Pathian thu chun, "Pilna chu a pawimawpen ah, tichun, pilna chu nei in, thildang zosia

HINNA VÂK

sang in hiatthiamna chu nei in” (Thupilte 4:7) a ti a hi.

3. Al Hiatna Leh Pathian Hiatna

Khawvel um tîl apat in, mihingte hin Pathian i hiatdan uh hi kibang veklo hileh a kilawm hi. Gen di tamtak umte lak ah “Chawl hun nei Pathian” (*God Of The Gaps*) chungchang hi vak ngaitua leu hin. Nidang lai ah khan, khawvel ah thil tung pangailo - Siatna, tui lian, linling, natna, kial (tâm) leh thil dangte tung sek a. A ziak helo in, a hung pawtdawna bîk hiatlo te a hung tung ah, Pathian lungnatna suklatna chi khat gual ah ngai in, Linling Pathian, Natna Pathian, leh Kial Pathian leh a dang dang tî’n a mekmat sek u’i. Natna huausia tak tak, thina huausia tak tak hung tung sekte chu le a ziak hiatlo ziak in Pathian a ngaw sek uh a hi. A ziak chu a bullam ah i gen gual in “Chawl hun nei Pathian” *God of the Gaps* hi a lah chiapi dan uh a hi ziak a hi. Zia hi chi leh nam chuam chuam chanchin khenkhat in le mu di a um hi. Ei lam ah hinle, sakhuana khenkhat in ziagual ngaidan pawl khenkhat le a lah um a hi.

Pathian I lah hiatthiam dan uh le tuhun ah i hiatthiam dan uh tawh nasatak in a kikhe

khawpmai tai. Pathian chu a pangai gual in a um zing ah, i hiatthiam dan zawk uh hi a danglam a hi. Science thiamna a sân tâk ziak in mi khenkhat chun Pathian um hile a pawimaw bek bek tapuai a ti tau. A ziak lianpen chu a hi leh, mihing lungthim hiatzawlo tamtak leh i haksatnateu hi Science mangcha dawnhuna i mu thei tâk ziak uh a hi, ti thei ina.

Khawvel in a gen danglam mama Artificial Intelligence hin banggual tiang ah Pathian chungchang ah ngaidan a hei danglam em? Thil hiat zung zung di utna khawvel, zil peilo leh sim peilo ah hawldaw bailam khawvel ah hin, i pauchapnateu tiang le ngak zolo i hi kha diam uh?

Numei Pawsal kingaina kikal ah buaina nei, a thei dan dan ua sukfel didan a hawl ua, dawtna tamtak a nei ah, dawnhuna a hawl ah, kin tak ah dawnhuna kipia kha amau â ding in thil pawimaw masapen chu a hitai. Lungthim ah dawtna um chu tulai ah khawl (technology) biakthei/hothei/kihopi thei **META** AI a h’em, ChatGPT a h’em a dawng ua, a kihopi thei ziang hi. Dawnhuna mu zung zung/mu vak/mu pai dawimite â ding ah kipak um tak hidi a hi. Duthusam gual

tak in dawnhuna mulo maleh, kin tak ah dawnhuna mu him him chu a nuam di mawng chu a hi. Nungak Tangval, tanglak khenkhat chun “Google Assistant sâng ah pawl nuam leh dawt tâk a um puai” ti’n ngaidan a nei u’i. Himaleh technology banggual in ma sawn in, khangto ziang lehle, dawnhuna bukim chu um tak tak diaklo a hi.

Tulai masawwna nasatak kal ah hin, i hiat ding uh pawimaw chu - “Pathian hi bangkim chung ah thunei a hi” ti hi a hi. A hiatphaklo, a thu nuai ah umlo hi bangma umlo a hi. Setan in Job a sawisak natiang khale, Pathian hiatpina nuai ah thil tung a hi ti hi hiat ding ah pawimaw tak leh ngaitua kham ting a hi.

4. Homo Deus

Homo kiti chu mihing genna ahia, **Deus** chu Pathian. **Homo Deus** chu Pathian-gual-mihing, sap pau ah chun (*God-Like human*) tina a hi tuak hi. Leichung ah mihing chanchin i mu masakpen ua kipat zia ngaituana -Pathian gual, Pathian gual ah um ti hin, mihing lunggel/lungthim subuai in, thepna liantak a siam ta a hi. Eden huan ah, Adam leh Evi theiga ne ding ah thep ah

um in sia leh pha hiatna Pathian gual (*Homo Deus*) hung hithei di lahiu ti a gingchau ah, a ne tau. Mihingte thiamna a sâng zel ah, Suang bep hitalo in, lei kihal tâk (*Brick*) siamdan tiang a thiam pan tau. Babel mun ah khan mihing kilopisakna ding ah a thiltup uh chu, “In sang, a sîp zum apat van khawi khak theina ding ah sak a hi” ti a hi. Van khawikha thei di tiang ah In a sak thei uh a hi chun, Pathian gual tuk ah nasem thei ding ah kingaina nei maithei di a hi ziaak un, a tawpna ah i hiat uh chu, suksiatiak in a um ta a hi.

Lal Nebukadnezzar in Babulon lopina a kiletsakpi chu, van ah kipat Aw a hiat khawlawna “Pathian chu Lal pen leh thuneipen a hi” ti leh Lal Tura leh Lal Herod ah kipat thil tamtak mu thei di a um hi.

Tulai khawvel thiamna nasatak ah masawwna in a huap khawm chu mihing chungnung bîk, Superintelligent siamdaw hi a hi. Al, *Genetic Engeneering* leh *Cybernetics* te kithua khawm ah, mihing chungnung tak, thiamna leh hitheina sâng tak nei, natna leh thina chungchang ah le a daisawt di leh a to di diak ah siamdaw thei didan a ginchat thu uh nasatak in a tangkopi laitak uh a hi. Zia chungchang hile hawitak

HINNA VÂK

leh ngun tak ah i ngaitua uh a hi chun, **Homo Deus** lam ah lutthûk thei thil a hi.

Mihingte science thiamna ei petu chu Pathian a hi. A petu mu chianlo in, a thilpiak jawk i buaipei nasat ziaak un i chia khial sek uh a hi. I mamaw ei petheitu, i dawî dan lam hilo in, ama lemguat dan leh pha a sak dan dungzui zawk in ei pe sek a hi ti hi hiatchian a pawimaw hi.

5. AI - Tulai thiamna leh Nek hawlna

Natna mudaw/suidaw leh etkawl chungchang leh damdawi leh *vaccine* siam dawna kawng ah te'n, nasatak in ma a sawn hi. Natna khenkhat vang vang hichu khawvel ah um talo gual tuk ah puanlat in a um hial ta a hi. A hung kipatna leh sukdam didan mudaw tamtak a um zing lai ah, Natna khenkhat - Cancer, AIDS chu taksa ah a hung kilat/kilang/mudaw ahilo ngal chun, mudaw hun ah chun, a vaigei ta thei sek ah, sukdam a h'em, etkawl manlo a h'em tamtak a um hi.

Tulai thiamna - AI leh Biotechnology kithua khawm in, masawanna nasa jaw diak um thei in lunggel nei a hi. I taksa chung ah thil phalote hiatdaw theina ding ah, i taksa ah hin

thil neucha (technology) **Chips** kiti hi kiphum intin, zia chun i taksa chung ah thil hawilo a lah umte kha, hiatdaw bailam leh etkawl vak hithei ngal ding ti a hi. Tak chuleh Cancer leh natna dang dangte chu a hung kipat ah kipat bailam tak ah hiatdaw zung zung theita di a hi. Taksa a khawi siat ma ngei in, zia natna hik chu a umna jawn chet chet ah lakdaw thei ding ah um di a hi. AI thiamna hin masawanna leh bailamna bîk a hung tung gaw pan pan a hi. Zia chu a hi zinglai ah, a hung tung jel dingte hile gen senlo gual hung hidi a hi. A hi vâng in, Natna kiti a sukdam theina mudaw a hi sek vang in, a sâng ah nasazaw hung pawt sek a hi ziaak in, sukdam bukim um diaklo di a hi.

Khawsak didan bailam zaw mu a hi zinglai in, khenkhat â ding in AI ziaak ah sepna leh nek-hawlna chân di dinmun in a um tai. Kum 20/30 nung leh mihingte nasep didan hi banggual a hung hi diam ti hi ngaitua kham tak a hitai. Kum 50 masang in ziagual thil hi a lah umta hileh, tu hun ah mihingte bawl thei bang a um nalai diam ti ngaitua kham tak ting a hi. Zia bep chu hilo in, Nasepna thak/nasepdan thak bangjat a um be diam? Mihing Nasepna di pawdawktu

Company leh Industry lian tak takte hin nasem ding in mihing sang in Robot a mangcha pan tau. Restaurant ah le waiter ah Robot a sawl tau ah, Dawr khenkhat vang vang chu a ngaktu umlo ah chawkt heitha a hi. A phatchuamna igen zing lai un, a langkhat lam ah chun a phatlonah hile kigen senglo maithei a hi. Al masawanna mat dan lam ah hin, pilvanna di tamtak le a um hi.

6. Al phatchuamna leh a kimatna khenkhatte

1) Na khat tanlo ah sep nawn/zing theina, Thagum leh mihing in a sukkhial theina suk tawm/kiamna.

#Thilsiamna, Datalakkhawmna leh a bîk tak ah, customerte panpina nasep piakna.

Kingang/kinaw tak ah sep daw theina leh kibang zing jiang ah siamdaw theina.

2) Hun zosia ah mat thei ah um zing: Al hin Mihingte gual ah kichawl a mamaw pua, mihiam te septheina khêlah sem thei zing chuleh a tangpi in a sem bukim diak hi. Zia zia khat chun customerte panpina leh venbitna nasep in a phachuam hi.

3) Thupukna kintak ah siam thei (Atangpi): Al hin Data liantak tak zil in, kingang tak

in thupukna a siam thei hi. Thupukna le a tangpi in a bukimna tiang le aum thei hi.

4) Data zilchian leh thil chiadan hetna: Thil chiadan tangpi zilchianna/mudawna mat a hi. Al hin a hitheilo di thil (error) bawl guat tei tei a gaw pua, a diklo muchian/hiatchian nung bep in a thil hitheina a sulang hi.

5) Mihiamte gual ah sukkhial ngailo: Al hin Data leh thupuk dan dungzui bep in nâ a sem ah, zia zia khat chun mihing gual in a sukkhial ngailo a hi. Zia ban ah chun, mihing hiatna gual neilo a hi zia khat in a thupuknate dem kailo a hi.

6) Mani mimal dawidan: Mani mimal dawidan gual in na sepsak thei a hi. Gen ngai seselo in, i dawidan leh lunglut lamte apat in i dawite zildawkt thei in, na sepsak thei in a um hi.

Etsakna ah chun social media chuam chuam ah i etnawp te hawl ngailo in a ban in a hung pe sek hi. Shopping Apps chuam chuamte apat in social media platform ah kilang thei in a hung taklang sek hi.

7) Mi tamtak a ding ah nasem: Al hin khatvei thu ah mi khat â di bep ah nâ sem hilo in, khatvei thu in mi tamtak â ding in, na a sem thei hi.

HINNA VÂK

8) Industry bîk ah phatchuamnate: Mihiamte thahatna khawi theilote bep hilo in i dawidan tak in na lianpi siamsak thei a hi.

Damlo etkawlina: Al panpina ah surgery bawl leh dawmdawi thak mudawna mat phatchuam. Mihiamte khut ah bawl sang in, a hun leh suk khial asu tawm thei hi.

9) Transportation: Mihiamte hatna in Traffic control i bawl uh sukdaina ding in, Traffic Light mang phachuam. Gari natiang hile a hektu umlo ah control thei di tiang, a siatna hiatdaw bailam leh Airways, Railways, Subway natiang in le nasatak ah mihiamte mat phatchuam thei a hi.

7. Al Disadvantage

Phatlona a tangpi chawmkim thei dipen ah ziagual hin –

1) Sepna/Nêkhawlina tawmsak/kiam: Al hin bailam tak ah nasep theina apat hin, nêkhawlina leh sum leh pai muna a tawmsak thei hi. Mi khenkhat gendan in hun hung chia zel ah hin, thiamna nei mi hunkhawp te Al ziak in sepna/nekhwawlina tasam ding in le a gen u'i. Al machine hin mihiamte zil nawpna leh kukalna le a sukiam ma ma thei hi.

Etsakna ding in: Customer service, telephone leh electronics chuleh lasak natiang hile Al mang pawl kium ta, mihing lungthim senna sukkiam- calculation, sui chianna leh a diktak hawldawna hin kiamlam a manaw hi.

2) Mantam: Al hi ama bep ah changkang theilo ahia, a hun dungzui ah then danglam zel ngai system a hi ziak in, mithiamte ma ma mamaw zel di a hina in, mihing pangaite hiatna nei mai maite bep bawlthei a hi pua, thiamna nei chungchuang bep in a bawl thei uh a hi ziak in, sum tamtak lut ah sukthak zel di a hi. Thil man chu suktawm sang ah pun lam manawto jel di i hiu.

3) Mihiamte hiatthiamna tasam di: Al hin a bawlthei leh septhei tamtak nei maleh, mihiamte gual lawm lawm ah a sia a pha, ngaituana, lunggel leh theina bukim a nei puai. Thil a hi didawl leh chiadan tangpi ah thupukna siamthei maleh mihiamte gual ah khankhua leh khawtang dawidan lungput a neilo ziak in, Mihingte â ding ah chu kingakna tak tak ting zolo di a hi.

Thupukna lathei di khawl (machine) thil hitheina tiang

ah hin a dikna um maleh, khawtang dinmun susiatu leh hiatthiamna lungput nei a hilo ziaik in, mihing tawh tekhin thei a hipua, kingak tâk a ting zolo a hi.

4) Khenchuam a nei thei hi: Al hin a bawlthei leh hiat zosia hi mihiamte siamkawm ngen, mihiam in a dawidan tiang a bawl sak thei ding ah siam a hi. Ama ngawn ah bangma pianglo a hi. A siamtu/ bawltu dawidan, tidan leh sia leh pha hiatna kinga a hi ziaik in, ngaidan kibatlona, kidaidanna, kichuam bawlna, kimutawmna tamtak, nekhawlna, dan siamna leh thil chuam chuam a pian sak thei hi. Mihiamte kingainat le nasatak in a sukha thei hi. Al hin Numei Pawsal ti le hiatkhen theina tiang neilo a hi ziaik in, Al hi mihiamte kingakna tâk a ting zolo a hi.

Etsakna'n: Al in a thil hung bawlte hi mihiamte gual ah lunggel thiamna neilo a hi ziaik in, mi guat chuam bîk, mi telchuam bîk, Sepna lam, semtu di hawlna lam leh kigakna Dan (Law enforcement) lam ah hin, khenchuam bîk a neilo theilo a hi.

5) Thuguk/Sel guk bîk ah kep hawi a sukiam hi: Al hin mi hiatna, siamsa, ziksa te apat information a lakkhawm ahia, a neitu hiatpina umlo ah, hiatlo

kâl ah thil tamtak lakhawm thei a hi ziaik in a sia lam in mi a sukha thei hi. Mihiamte â ding ah a bîk ah Mimal Chanchin (Data - Aadhar Card apat), Bank Account apat leh a dang dangte hin, i khawvel hung khanto dungzui jel ah mimal thuguk/selguk haw hi hung tawm deu deu di a hi. Mimal zalenna natiang sukha thei intin, a tawp leh mihingte hi machine zawk in ei kaihuai di hi lau um a tai.

6) Bitna lam ah lau thawng um: Al hi a phalo lam ah sudanglam in galvan ah matthei a hi. (e.g., deepfakes, AI-powered cyber attacks).

Al hin neitu hiatlo ah thil pawimaw lak piak theina a nei ah, mi bawlta sudanglam in a lêm/siamkawm thilte in mi a them thei hi. Chankang tak ah Gari leh technology chuam chuam a hektu umlo in a control thei ah, himaleh thilpha sang in thilsia tut theina tamtak a um hi. Tulai kidona Galvante natiang sukdanglam piak theina, a neitu thil chawizinglai siam danglam piak theina khawp (Cyber Attack).

Etsakna: Drone i titeu hile, nidanglai a chun, lim leh video bep kapna kimang sek pen kha, tuhin a puak thei, kidona galvan in, mihiamte dawidan

HINNA VÂK

tak ah sawisak thei ah, galvan ah mat a hitai. Al in a thil sep thei hi, mihiamte thahatna thiamna hi bangmalo mai gual ah a tunsak thei hi.

7) Machine (Khawl) mang ah kingak/kitodel takluat zia ah matkhial thei a hi.

Al ah kingak takluat leh kitodelna mat takluat hin mihiamte Pathian in ei thilthawnpiak, ama gual melpu ah ei siam ban ah, thiamna, pilna, chitna, khutthiamnate hi a sudau thei ah chuleh ha mat takluat hin mihing thil hitheina bep hilo in, a siamtu, ei petu natiang muanmawna um thei di a hi.

Zia bep chu hilo in, i thiamna, pilna leh hiatnate hile i mat phatchuamlo chun a kiam thei hi. I memory natiang le nasatak in a sudanglam thei hi.

Pathian ah kingalo ah, machine ah kingak takluat hin, Pathian thu hi eima jawk hin i thu thu pui khak thei a hia, kiven thiam pawimaw a hi.

Al ah kingak tâkluat lau um mamana khat chu Al in a bawl theilo hun a hung tun hun a ei uh â ding ah thil mak tak a h'em/lau um tak thil a h'em hung tung taleh, mihingte hin i thunun zawlo di thil lau um tak hun tut tu hithei a hi.

Thukhakna: Khawvel thiamna sangto jelna ah hin, dawnhu theina thil suidaw, puakdaw di thil tamtak mudaw in um maleh, zia sang ah haksa jaw hung um jel di a hi. Mihingte hin, “I mamawteu dawnhuna ei petheitu, i dawidan zosia i nei tau” kiti thei ngailo a hi. Malaria natna sukbei didan i thiam zaw nung un, a dang a hung piang ngen ah, zia natna chu sukfel a hitai ti theilo khawp in, tawp hun umlo di a hi. Al thiamna hi a pawimaw hi i ti zinglai in, a lau um theina tiang le aum ah, buaina tun khawlaw thei hial di a hi ti hi khawvel in a buai pi to jel chu a himai hi.

I mamaw i nei thei zia ah, thil dang dawnhu theina ei pethei thilte zia in, pathian mamawlo hial ah kingai thei hun hung tung thei a hi ti hi lau um tak a hi. Pathian in siam kawm thil (Al) sâng ah lopi zaw, hiatna leh chitna tawp neilo (*Infinite Intelligence*) mihingte lungthim ah hin a kawi ah, zia chu nei in, ei uh nunnawp leh bailam hawl na mang phachuam ding in i buai pi zaw tau. I Pathian ginlana mat hilo in, a lopina zawk ah mat phatchuam zawk di a hi. Mihingte thiamna leh thil hitheina hin tawp hun tiang a nei sek hi.

KOCHUAM HISEL

~ *Ginlalmuan @ G.L. Muana Neitham*
New Lamka

*Amau haw chu sawlchakte thuhilnate leh kithua khawmna,
vaithum phelna leh pauchapnate'n a kipelut zing tau a.*
Nasepte 2:42

Jesu Khrista'n a hepi ma ma Kochuamte zosia, a hung kit vak ziang tading i Lalpa'u Jesu min in chibai. New Lamka Presbyterian Church Biak In a kiphudaw kum 25 tinna Silver Jubilee i matnau tawh kizawm in Khrista Kochuamte haw'n i hiat ding uh leh i ngaikhawm ma ma ding uh **KOCHUAM HISEL** ti umzia zilkhawm hitiu. Kochuam i ti tak leh chu Jesu Khrista gingtu, Thagau ah piangthakte zosia genna a hi. Ahinla, tuchung ah hin Biak In ah kilawikhawm zing sek, a vantang in Kochuamte (*in a Church setting*) gen ding i hui hi.

Kochuam HiseL kiti chu bang gual Kochuam ei ta diam? Bang in Kochuam chu hiselna diktak (*truly healthy*) a piak ei diam? Biak In thupi leh a let zia k hilo in, Kochuam mipi tam zia k le hilo in, kikhawpna programme a mat thiam zia k le hi diaklo in, thugen thiam leh minthangte zia k le hilo in chuleh Kochuamte thawlawm sum dinmun a phat zia k leh hausat zia k uh le a hi diak pui. Khawvel leh taksa thilte

le a pawimawna tiang a um nai hinla a poimaw masapen chu hilo a hi. Kochuam hisel chun khawvel taksa thil ah lawtinna a del masa puau hi. Zia sang'h chun Pathian lopina ding bep leh khawvel thim salvaktu hiding a tup zaw'ui. (Mat 5:14-16) Kochuam HiseL chu thil bangkim ah Pathian lopina pia zing kawm ah Khrista Jesu ah khangto zing, (*growing in Christ*) Kochuam mite kihepitua leh khawvel

HINNA VÂK

gam thim Khrista chanchinpha ah salvak zingte chu a hui hi. Thagua lam detdona, Bible zilsakna dik ngaikhawkna (*Biblical faithfulness*) chuleh Khrista dawigual ah hing ding chu Kochuam hisel ten a ngai pawimaw takzet un a hi. Tulai ah hin Kochuam Hiselna ngaikhawk a pawimaw diakna chu a hileh muntin gamtin ah kipat in zilsakna diklo leh beidawng um tak tak mai thiampu lêm a hung pawtdaw tâk zia a hi. Kochuam mite, a diak in Bible lam ah hiatna nei tawmte puimang leh chawk chavai ding zilsaktu lêm a tam tan pilvang a kûl takzet a hi. Biak In umna sawtta ngal a hinla Bible zilsakna lam ah nausen gual ah khawsa kitam ma ma nalai ding a hi. I gam ah Pathian Chanchinpha hung lutna kum 100 bang a valta'n a hinla Kochuam hiselna diklo kitam nalai ding a hi. Bible zilsakna diktak helo leh zuilo kitam talua nalai a hi.

Kochuam hisel, Kochuam hing leh Kochuam diktak, zia pathum hin a gen(kaw) kibang a hi zia in hung kimang hel sek ding a hi (*interchangeable*).

Pathian Thu thiango ah pat in Kochuam Hiselna ding ah pawimawte tamlo vak zikhawm hitu.

1. Pathian Thutak Genna leh Kizilsakna Dik (Nas 2:42, 2 Ti 4:2-4)

Kochuam hisel hiattheina masapen chu Pathian thu a hîna bang tak ah zilsakna chuleh Jesu Khrista leh a chanchinpha (gospel) dik tak ah genna hi a hi. Khrista Kochuam diktakte chu Pathian thu he ut ah kizil zingte a hui hi (*Learnig Church*, Nas 2:42)

Zilsakna (teaching) chu tulai pau ah het awlsam pen ding in doctrine tina a hi. Kochuam sung ah Pathian thu gête leh zilsaktute (*Pastors, elders, Bible teachers*) chun Bible zilsakna bukim a het ua, mipite a gen sawn (*preach*) zel ding uh a hi. Sawlchak Paul in Timothy kiang ah chun Pathian Thu dik tak ah gen ding in a hil hi. Gen ve mai mai ding hilo in, diktak leh hangsan tak ah gen ding tina a hi. Pathian Thu a hina gual tak ah gen ding, mani phasak leh dawigual in a h'em a hiloleh khawvel mite phasak leh tuhun tawh kituak ti ah

dâu sak (*dilute*) ding hilo a hi. Bible ah kigente gual tak ah zilsak chu (*biblical teaching*) Kochuam hiselna ding ah pawimaw bulpi pen a hi. Bil ah lutthei ngainawp umte bep buaipina khawvel hitamaleh le Kochuamte chun Pathian thu bukim (*whole counsel of God*) tak in gen in, a kizilsak zel ding uh a hi. Pathian sawlchak masate ginna leh zilsaknate (*Apostles' teaching*) chu Kochuamte'n phatchuam ngaitak in i zilto zel ding uh a hi. Kochuam hisel chu Bible zilsakna kizil utte a hui hi (*Learning Church*). Pathian thu zil utte i hi nau em?

Tulai khawvel mite lunggel nawpsakna ding hawl a tam ta'n, limna leh thamuanna diklo chuleh gospel lêm chiapi Zawlnei lêm a tam ta a hi. Kochuamte vang chu Pathian thutak bep ah ding det zing ding a hui hi. Kochuam hiselte chun thutak An in mipite vâk in, tulai khawvel ngaidan in a chialo ding uh a hi. (*Feed on the Word of God not on world's opinion or culture*)

Kochuam diktak Bible zilsakna zuite chun khawvel

mite ah pat in demna, bawlsiatna, pampaina, gensiatna chuleh ngâwna diklo tampi tuak ding a hui hi. Pathian thutak zia in thuakna maitua ngam ding in Lalpa'n a Kochuamte ei dawi hi. (1 Ko 16:13; Joh 15:18-19)

I taksau hat leh damtheina dingun An pha nek a pawimaw gual in Kochuamte le i hisel ua i hattheina dingun zilsakna pha i pawimawu hi. (*we need sound doctrines*)

2. Hepina diktak tawh kithuakhawmna (Joh 13:34-35, Nas 2:42)

Kochuam hiselna mun ah chun Pathian hepina in Kochuam mipite a kihepitua ding uh a hi. Kihepituaana a umlo chun Kochuam hisel hilo ding a hi. Lalpa Jesu'n eite ei hepi gual in ama gingtute, zia chu ama nungzuite kiang ah thupiak thak (*new commission*) ei piak chu kihepitua ding a hi. Bangkim ah kihepitua zing ding ah thupiak i hui hi. Jesu thupiak zui ding chu Kochuamte mawpuakna a hi. Kochuam hiselte chun zia thupiak chu ngaikhaw in, a zui ngei ngei ding uh a hi. Ei

HINNA VÂK

Kochuam ten i zui nau em?

Nang uh Kochuam te'n la zui hemil kha tau em? Khrista Kochuamte chu taksa, lungthim leh Thagau lam ah kihepitua dingte chu i hui hi. Biak In sung leh pulpit thugenna mun bep ah kihepi ding hilo a hi. Kipak ni hihenla da ni'n le kengkhat ah dingkhawm dingte chu Khrista Kochuamte i hui hi. Jerusalem khawpi Kochuam masate a kithuakhawm dan uh chuleh a nei leh lamteu ah a kipanpi (*sharing*) tua dan uh kha vak thîl thak kit leuhin eite-â ding in zillai tampi mutheiding a um hi. Bangkim ah kikhawtua leh kihepi tak in a kithuakkhawm sek ui ti Bible in ei gen hi. Kochuam Kithuakhawm leh kipanpitua zing sekte chu Kochuam hiselte a hui hi. Inkuan khat chu nekhawm leh dawnkhawm, nui leh kap khawm sek a hi gual ma un, Kochuam hiselte chu bangkim ah kithuakhawm dingte chu a hui hi. Kochuam mite haksakna, dâna leh kipakna hunte ah kithuakhawm leh kipanpitua zing ding in panla to zel hitiu. (Gal 6:2)

3. Baptisma leh Lalpa Zan An kipumkhat tak ah nekkhawmna

Jesu Khrista Kochuam diktak, Kochuam hisel hiattheina khat chu Lalpa Zan An nekkhawmna chuleh tui ah gingtute baptisma channa hi a hi (*Water Baptism*). Lalpa Zan An tawh tui Baptisma, ziate ni hih Jesu Khrista gingtu, Kochuamte Sacrament pawimawtak chu a hi. Jesu gingtute'n Bapstisma a chang ding him uh a hi. Hukdamna ding ah taksa Baptisma chang (kibawl) kihilo in hukdam chate, zia chu mi piangthak, Jesu gingtute tapo Baptisma a chang ding uh a pawimaw ma ma hi (*believers Baptism Nas 2:38*). Mutheilo sunglam Pathian hepina zia bep ah kitheng danglam tate, gitlona zosia ngaidamna chang in Jesu Khrista ah hinna thak neite zia umzia chu Thagau ah piangthakte chun pawlam muthei ah (*outward sign/symbol*) taksa ngei ah, tui baptisma chan ding uh a hi (*Physical water baptism*). A hithei liai chun gingtute baptisma hi tuiphum (*by immersion*) ngei ah chansak

ding a hi (*Nas 8:36-40*) Baptisma chandan hin (*mode of baptism*) hukdamna a sukha pua'n ahinla Bible in kichiantak ah a gente haw hi zui chu a navak mai hi.

Kochuam hiselte chun gingtute baptisma channa hi a ngai pawimaw un a hi. Kochuamte bawl, dân zaw bukim sakna bawl mai mai ding chi hilo hial a hi. (*Rom 6:3-6; Mat 28:19-20*)

Ziagual ma chun Khrista Kochuamte chun kipumkhat tak in (*unity*) Lalpa Zan An a nekhawm sek ding uh a hi. Lalpa Jesu'n a nungzuite thu vaithakna a thupiak chu eite-â ding inle thupiak a hi ziak in i bawl ding uh a hi. (1 Ko 11:24-26; Joh 6:51)

Kochuam hisel zelna ding in Lalpa Zan An hi lûl tak ah bawl zing ding hi. Lalpa Zan An (*Lord's Supper*) umzia leh a pawimaw dante haw Kochuam mipite hetchian sak zel ding a pawimaw ma ma hi. Jesu Khrista'n ei hepinate, ei- â ding ah thi-in, thina zo-ah thân ah pat a thawkitna hetzingna in i bawl zing sek ding uh a hi. Muthei ah Pathian

hukdam chate, khawvel ah Jesu hetpitu (*witness*) leh a hung kitna ding kinem tak ah ngak zingte i hinau kilatna a hiziak in lungthim kingaitawm tak in, gitlo thupha chawi-in chuleh zâ tak in zia An kuang chu i ûmkhawm (nekhawm) sek ding uh a hi (1Ko 11:27-28)

Gingtute â ding ah chun 'Lalpa Zan An' hi Thagau lam ah Jesu thina leh thawkitna kizawppina chuleh Jesu Khrista taksa khat Kochuamte kipumkhatna (*united as one body in Christ*) taklatna a hi ziak in Kochuamte'n i bawl ding him uh a hi. Lalpa Zan An tawh gingtute Baptisma ngaikhawklo Kochuamte chu Bible zilsakna kichiantak hetnak sa sa ngaikhawklote a hui hi. Bible zilsakna kichian tak zuilo Kochuamte chu Pathian demkai Kochuam hi ding a hui hi. I chennau gam puan a hiloleh i nam puan chiat uh ngaisang ah i tâk pal (hoist/waving) sek gual un, gingtute'n le Lalpa Jesu-â i hinau kilatna leh i ginnau sukhat (*renew*) kit sekna in 'Lalpa Zan An' chu i nekhawm zing sek tau in a hi.

4. Pauchapna ngaikhaw- Pathian hatna bep ah kinga (Nas 2:42; Jak 5:16; Eph 6:18)

Pauchap zing Kochuamte chu Kochuam hisel leh Kochuam thahat a hui hi. Mimal leh Kochuam mipite pauchap khawmna bawl zingte chu Kochuam hisel a hui hi. Kochuam masate khanle pauchapna a ngaikhaw ma mau hi (Nas 2:42)

Pauchapna chu Kochuamte â ding in hatna bulpi ahin, Pauchaplo kochuam chu tha neilo, Kochuam hatlo a hi. Pathian mi matchak E.M Bounds chun tihin a la gen hi “Thil pathum lungthim ah kawi zing ding chu; Pathian in pauchapna a ngaitha’n, Pathian in pauchapna a ngaiven in, Pathian in pauchapna a lawtinsak in chuleh Pathian in pauchapna in zalenna a pia’i”

Martin Luther chun tihin a lah gen hi; “Pauchapna chu Kochuamte â ding in kihumbitna kûlpi leh bâng dettak ahin, galdona ding ah matchak thal phatak a hi”

Bible ah mun tamtak in le Pauchapna leh pauchap zing a

pawimaw zia a kimui. Pathian dawigual ah diktak ah hinkhua mangte pauchapna a lûdan, lungchang puakzak (contrite heart) ah pauchapte Pathian in a ngaikhaw dante chuleh bangkim in Pathian khut ah kilân thiangtho leh kipedawk leh chawlo ah pauchap zing ding a pawimaw dân Bible in ei zilsak hi. Pathian in ama phasak dân leh ama ti hun in Kochuamte (gingtute) pauchapna chu dawnhu piak ding a hi. (Jak 5:16; Php 4:6-9; 1 Th 5:16-18; Mat 6:5-8)

Pauchapna a pawimaw dan tampitak i he tau in, Pathian dawigual ah Khristian hinkhua mang leh pauchapte i hi nau em? ti hi mitin kidawtna pawimaw tak a hi. Kochuam hiselte chu pauchap zing Kochuam a hi ding uh a hi. Pathian ngaisak (thumang) Kochuamte pauchapna chu Pathian in limsaklo in kawilo ding a hi. Pauchap zing Kochuamte i hi nau em? Mimal, Inmun, Biak In, Kochuam meeting-na munte chuleh i kimukhawmna (gathering) haw’u ah hin Pauchapna i ngai pawimaw masapen nau em?

Mimal leh Kochuam pauchapna ngaisaklote chu gari a thau tui bei gual a hi. Gari phatak ah a taina ding in thautui a pawimaw gual in KochuamtelePathiandawigual ah i khangto (*growing*) zelna ding un pauchapna i pawimaw u'i. A khutilo chun Setan dawigual ah khangto Kochuamte hikha ding i hiu hi! Pathian dawigual ah taksa leh thagaulam i khangto theina dingun Kochuamte nguntak in pauchap zing hitiu.

5. Thupiak Thupi; Chanchinpha Hilna (Mat 28:19-20; Nas 2:47)

Jesu Khrista'n nungzuite kiang ah thupiak thupi (great commission) a piak kha sep bukim ding chu Kochuamte mawpuakna a hi. Kochuam hisel khat chun thagau mangthai dingte khawksak in a vêi zing a hi. Hukdamna changtâklo Pathian hepina ziak bep ah hukdam Khristian khat chun a mihiam chanpite thagau mangthai ding chu a vei takzet ding a hi. Chanchinpha hilna (*evangelism*) ngaikhawklo kochuamte chu a hukdamnau beidawng um hi ding a hi. Mikhat chu a hung

piangthak ah pat in thagau mangthaite veina a hung nei ngal sek hi. Kum bangzat eita diam Khristian i hi nau? Thagau mangthai dingte lunggiltak ah puaknatna la nei kha ta em? I inkuanpi te'u thagaulam dinmun i ngaitua kha sek uh em? Thupiak Thupi ah hin Kochuamte'n dawitelna neilo i hiu hi. Thupiak zui ding chu i mawpuaknau a hi mai hi. Kochuam tin in Mission leh Evangelism nasepna (budget allocation) ah pat in Kochuam dinmun hiatthei mai ding a hi. Mimal tin vak kidawng leuhin, chanchinpha thu hi i kîm leh kiangte, nasepna munte, nam sung leh gam sung in i gen/hil zel nau em? Jesu hiatpitu in i pang zel sek nau maw? Gamthim nasepna in sum leh pai in pang huntawk i kisa nau em?

Thingkung hisêl tak ah pat theigâ hawitak a hung pawt sek gual in Kochuam hisel chun nungzuitu a siam ding a hi.

6. Pathian zâ tak ah Biakna leh Kikhawpna (Joh 4:23-24, Nas 2:46-47)

Jesu'n tihin a gen hi, Pathian be tak takte chun

HINNA VÂK

Thagau leh thutak in a ho ding uh a hi. Kochuam hiselte chun biakna kikhawpnate ah chun Jesu Khrista chawisang in, Pathian lopina bep a pe ding uh a hi. Biakna (worship) chu mihiamte kichawisangna ding hilo a hi. Lunggel nawpna (*emotional fulfillment*) ding leh tumgingte (music induced) hat ah limna hawl ding hilo a hi. Thagau Thiangtho Pathian chu ei ten khuanggit hat hem ah chawtho (*awaken*) guatlo ding a hi. Gingtute kiang ah umzing Thagau Thiangtho zawk chun ei chawhal ah, lim leh kipak tak ah Pathian pak in i chawihawi ding uh a hi zawi. Tulai Khristian khenkhatten a gen nuam vet sek uh, Bible zilsakna tawh kituak mamalo chu; 'Thagau a zalen thei puai' 'Thagau Thiangtho chu chial in, zalen tak ah nasem ding in thu ka piai' Pathian Thagau Thiangtho chu leisiat mihiamten i control thei ding uh hilo hial a hi (Joh 3:8)

Permission i piak ngai Pathian a hi puai! Khawitak inle Thagau a zalen zing hi. Nang leh kei zalen sak thei ding Pathian ei puai! Mihiam te'n i nawp dan dan ua sawl

leh matchak (used) guatlo hial ding a hi. Khristian khat umna chun Pathian Thagau thiangtho chu a um zing a hi ti hetzing ding a hi. Khawitak mun van ah kipat hem ah i kothâk guatlo ding uh a hi. (Rom 8:9, 1 Ko 6:19, Sam 139:7-8)

Kuanggit hât ah Thagau changguatna (pawlâ) lungthim haw hi neilo hial ding a hi. Thagau Thiangtho chu Pathian ahin, naupang khaw helo a hilo leh siamkawm pathian lêmte gual ah khuang (*music*) git hat ah kaithaw guat haw hi bawl keilo ding ah pha a hi. Pathian biakna leh kikhawpnate haw hi Kochuamte'n i thiamnau taklatna mun hizawlo in Pathian chanchinpha ziak ah lunggil kipakna dimlet in Pathian bia leh â thute lunglut tak a kizilsak in, Pathian thu i zilkhawm ding uh a hi zawi. Kibawlkawm (*superficial*) limna leh thanawpnate ah Pathian biakna chiapi i gam ua hin a tam takluat tâk ziak in pilvang ding a hi. Tulai Kochuam khenkhat ten **Praise And Worship** a chiapi dan haw'u le lungkham um ma ma tam ta

a hi. Bawlkawm (*superficial*) limna chuleh ngaituana leh lunggel kithununna (*emotional manipulation*) ding ah pâkna leh tumging (*sound system*) a lungthim thunun chîngte (*professional performers*) haw ah pat Kochuamte pilvang ding a hi. (Kol 2:18-19; 1 Ko 14:33,40; Jer 17:9)

Kochuam hiselte kikhawpna chun Pathian lopina ding a hawl un, mihiante kimawk paksakna ding a buai puau hi.

Gingtute kikhawpna chun Pathian bep biak ding a hi. Mihing leh mihing kipakna ding hawl na mun ei puai. Kigenphat leh mihiam pachâk hawl na mun hilo a hi. (Mat 4:10)

Kochuam hiselte kikhawpna mun ah chun Pathian thutak ginum tak a genna, (*faithful preaching of the word*) kizilsakna (*teaching*) leh Bible simna (*public reading*) a nei sek u'i. Khawvel chawndan (*culture*) tawh kituak ding ah Pathian thu kizilsak ding hilo in, Bible zilsakna tawh kituak ah gen ding a hi zawi. Kochuamte hin Bible zilsakna bep a zui ding uh

a hi. Kochuam hiselte chu tulai hun tawh kituak ah chia ding a hipuau in, Bible ah Pathian Thu tawh kituak zawk ah chia leh kizilsak ding a hi zawu hi. (1 Ti 4:13; 1 Ko 1:23; Eph 5:19; 1 Ko 14:40)

Kochuam hiselte kikhawpna (biakna) chun Pathian thu hi a dung a vai, a dit a det ah sui in, a bul-a tawp chuleh hilchetna tawh bangkim Bible zilsakna suichian in thu a gen sek u'i. Zia chu Sappau in *Expository preaching* kiti a hi. Pathian thutak gen dingte chun zia gual ma chun gen kisin chiat taleu hin phapen ding in ginchak a um hi. Kochuam hiselte chu Pathian thu Bible zilsakna tawh kikal lemlum a thu genkhak ding a kивeng ding uh a hi. Ei haw gam hi, i mawl naklai zia kun Pathian thugenna hi mizosia bawl ding in i kawi khau in a hi. Pathian Thu gen leh zilsaktu ding chun Pathian thu a hetchian ngei ngei masak ding a hi. (A bawn a dik tak a hetchian vang chu hithei sampua'n tin)

Pulpit a theology (bible zilsakna) diklo tak ah gen ah kiko ko haw hi haisan hun a hi tai. Revival speaker leh

HINNA VÂK

evangelist i ti teu inle Bible zilsakna kichian tak ah a zil masak dim diam ding uh a hi. Pathian thu zilna lam ah hin (*Bible education*) Kochuamte hin sum i seng zel ua kipak um ma ma hi. Sunday school thuzilte tawh Nilai zan thuzil le i bawlto zel ua a pha ma ma hi. Hinla zia sang ah hin bawl hawizawk thei ding tampi um ding a hi. Pathian matchak lekha thiam, mifel leh tawmngaite haw mawpuakna piak zel ding a hi. Kochuam mipite haw hi a tamzaw Khristian ginna leh Bible zilsakna (*Christian faith, belief and doctrines*) kichian tak ah helo a kihi ziak in, Khristian kizilsakna lam (*Bible Education*) ah hin panlak thak guat ding a hi. U pat leh senior ziak ah Bible zilsakna (*teaching*) lekhabu haw hi bawlsak sek ding tina umlo a hi. Theology diktak a hia leh a thiamte ma matzel ding a hi. Kochuam leh mission nasepna ah hinle mimal kidawisaknate, maipha hawlinate haw hi bawlllo hial ding a hi. Zillai bu hi henla Kochuam mipite â ding ah kibawl ding tapote haw chu a thiamte ma mawpuakna

piak zel sek ding a hi.

Kochuam hiselte chun Bible zilsakna hikhello (*traditions*) ah kizuite haw chuleh Bible zilsakna dik (*Biblical doctrines*) haw le mipite simthei ding ah bawl zel ding a hi. Kochuam khenkhatte chun Bible zilsakna dik mipi vantangte het ding ah pha a saklo ziak ua a îm chip pawl uh le um sek a hi. Pathian thutak vang chu selguk thei a hi puai! A neitupa Pathian a lopi ngal ah! Thutak chu thutak a hina bangtak ah gen mai ding a hi.

Theology diklo in Piangthakna diklo a tun sek hi. Piangthakna diklo chun Kochuam hisello, Khristian lêm a tun in tichun Khristiante lem in Kochuamte lak a hin nasatak in vaihawm in Kochuamte a suliam zing sek hi. Tigual chu a hiziak in Kochuamte'n Bible pumpi zilsakna hi sut det det zing in, Pathian thutak ei hetchian sak ding in Pathian Thagau Thiangtho panpina dawn zing hitiu. (Nas 20:27; 2 Ti 4:2-5; Kol 3:1)

Jesu Khrista ah ka suapi Kochuamte haw, Kochuamte hisel hina ding ah hin lawi-

upate bep mawpuakna a hi puai. Kochuam mipite zosia le mawpuakna ah hin i pangkhawm uh pawimaw a hi. Kochuamte chu Jesu Khrista taksa a hi ziak in (1 Ko 12:27) taksa bâk khata hiselna a phatlo chun taksa bâk dangte'n le a thuak kha sek hi. Zia ziak chun Kochuamten kawng bangkim ah Kochuam hiselna ding i ngai pawimaw ding uh a hi. Chiadan khat zuina (*routines*) gual mai ah nuamtak ah kikhawp bep guat zing ding hilo a hi. Thagau lam damtheina ngaikhawkna in, Pathian hepina kihepitua in, zilsakna dik ah kizilsak leh zilkhawm in, lunggil titak ah Pathian bia in, thiangthona del zing kawm in Lalpa Jesu thupiak gamthim nasepna nasatak in i sem zawm zel ding uh a hi. Jesu Khrista Kochuamte â ding ah thi a hi ti geldawk zing hitiu (Eph 5:25-27)

Chau leh basam chuleh Kochuam kithutuaklo ah kikhenzak ding in Jesu'n ei dawilo a hi. Kochuam chu bangkim in bukim (*perfect*) thei khel pua'na hinla Jesu'n panla kisiamthak zing ding in ei dawi a hi. Kochuam ah mawpuakna

nei hotute'n Pathian thutak hangsan tak ah gen in, mipite lampi dik in a pui huai zing ding uh a hi. Khawvel leh a sung ah umte haw hi thagaulam kithepna leh thutak bukimlo zilsakna lêm in ei tuam vel tâk ziak in Kochuamte zosia Pathian thu hing ah kinga zing, hithei ding in Bible zilsakna lam habawl hitiu. Khawvel ah hin lungthim nawpnate, a kilomte, a minthangte (*popular*) chuleh mitam zawte'n pha a sakte'u zui ziang dingte chu Kochuamte hilo i hui hi. Bangkim ah **KHRISTA** nungzui ding a kote i hi zaw'u hi. Zia ziak ah chun Bible ah Bereate gual ah bangkim sui det det dingte chu Khristian diktakte i hui hi.

Pathian thutak ah hing dingte chu Kochuamte i hui hi. Ka kikhawpna leh kei hi Bible zilsakna tawh kituak Kochuam hing kahi na em? ti ki-en pha thak zel hitiu. Pathian thutak ah dangchak thei zing ding in LALPA'N simtute zosia ei malzawl chiat taken aw.

1 Korinth 16:13

Kivêng unla, ginna'n ding det in, hangsan tak leh hat tak in um un.



Ni 25 July, 2025 (Simhaini) in Pi Phalhawiniang CKNP Committee Member leh Pi N. Hoinu, CKNP Committee Member te'n Nisin Insung Kikhawpna leh Anchangham thupi mang in Bialfan Dumlian Pastor Bial ah nei a hi.

A mun: Dumlian Kochuam Biak In



CKNP Bialfan Programme, Lamka Pastor Bial



D. Phailian Pastor Bial CKNP Bialfan Programme

August 2025



Munpi Pastor Bial ah CKNP bialfan.

A hun: Ni 29 July, 2025

**Hun mangtute : 1) Pi Kh. Thianniang, Chairman CKNP
2) Pi Lhingthianvak, Finance Secy. CKNP**



S. Kawtlian Pastor Bial ah CKNP bialfan.

A hun: Ni 29 July, 2025

**Hun mangtute : 1) Pi Dimtinniang CKNP Comt. Member
2) Pi Deikholam Comt. Member**